

SAMÞYKKT

um stjórnsýslu Stykkishólmshrepps.

I. KAFLI

Fundarsköp hreppsnefndar Stykkishólmshrepps.

1. gr.

Á fyrsta fundi hreppsnefndar að loknum sveitarstjórnarkosningum kýs hún sér oddvita og varaoddvita og fer um kosningu þeirra og starfstíma eftir gildandi sveitarstjórnarlögum.

Aldursforseti sveitarstjórnar boðar til og stýrir fyrsta fundi hreppsnefndar, þar til kjöri oddvita er lokið.

2. gr.

Oddviti stjórnar umræðum á fundum hennar. Hann sér um, að fundargerðir séu skipulega færðar í fundargerðabók, og allar tillögur og ályktanir séu rétt og nákvæmlega bókaðar, svo og hverja afgreiðslu þær hljóta.

Oddviti sér um, að allt fari löglega fram og skipulega á fundum hreppsnefndar. Hann úrskurðar um skilning á fundarsköpum skv. samþykkt þessari, en skjóta má úrskurði hans undir úrlausn hreppsnefndar, ef vafi leikur á um skilning fundarskapa.

3. gr.

Hreppsnefnd ræður sérstakan fundarritara utan hreppsnefndar, sem sér um færslu gerðabókar og hefur oddviti eftirlit með því, að rétt sé fært til bókar.

Í gerðabók skal skráð hvar og hvenær fundur sé haldinn, hverjir sitji fundinn, töluröð hreppsnefndarfunda, svo og hver sé fundarritari og einnig það sem oddviti vill láta til bókar færa, þótt ekki sé til getið í dagskrá fundarins.

Í fundarlok skal lesa upp gerðabók og skulu allir viðstaddir hreppsnefndarmenn undirrita hana.

Hreppsnefndarmönnum og þeim varamönnum, sem óska, skal senda afrit fundargerða innan 1 viku.

Hver hreppsnefndarmaður, sem eigi er sammála hinum á rétt á því, að ágreiningsálit hans verði ritað með fáum orðum í gerðabókina. Heimilt er að fresta lestri gerðabókar til næsta fundar hreppsnefndar, en þá skal afrit fundargerða sent hreppsnefndarmönnum innan viku og þeir fá viku frest til að koma á framfæri athugasemdum.

4. gr.

Hreppsnefnd heldur fundi einu sinni í mánuði nema í júlí og ágúst. Reglulegir fundardagar og fundartími skal ákveðinn í byrjun hvers kjörtímabils.

Farist reglulegir fundir fyrir vegna helgi eða annarra ástæðna, þá skal hann haldinn næsta virkan dag á eftir.

Aukafundi skal halda samkvæmt ákvörðun hreppsráðs, oddvita, sveitarstjóra eða ef þriðjungur hreppsnefndarmanna krefst þess.

Oddviti og sveitarstjóri boða fund hreppsnefndar.

5. gr.

Sveitarstjóri og oddviti semja dagskrá hreppsnefndarfundar.

- 1) Fundargerð hreppsráðs og annarra lögmæltra nefnda, sem þurfa kunna staðfestingar hreppsnefndar á ályktunum sínum.
- 2) Hvert það mál sem fellur undir verksvið hreppsnefndar skv. 10. gr. laga nr. 58/1961, enda sé þess óskað af hreppsnefnd, hreppsráði, lögmælttri nefnd eða hreppsnefndarmanni, að málið sé á dagskrá tekið.

- 3) Lögmæltar kosningar nefnda og starfsmanna, svo og hvert það málefni annað, sem hreppsnefnd á að fjalla um að lögum. Sá, sem óskar að fá mál tekið á dagskrá hreppsnefndar, skal tilkynna það sveitarstjóra eða oddvita skriflega með tillögu, fyrirspurn eða stuttri greinargerð eigi síðar en 3 dögum fyrir hreppsnefndarfund.

Sveitarstjóri skal í síðasta lagi 2 dögum fyrir hreppsnefndarfund hafa sent öllum hreppsnefndarmönnum dagskrá næsta hreppsnefndarfundar.

Í dagskrá skal tilgreina fundarstað og tíma, þær fundargerðir, sem fyrir fundi liggja, tillögur, sem fram hafa komið, og gera í stuttu máli grein fyrir þeim málum öðrum, sem um skal fjallað. Fylgja skulu eftirrit fundargerða, tillagna, afrita af skýrslum og athugasemdir endurskoðenda svo og annarra gagna, sem geta orðið til upplýsinga um málefni á dagskrá.

Aukafundur samkvæmt 4. gr. skulu að jafnaði boðaðir með dags fyrirvara.

Heimilt er þó að boða fund með styttri fyrirvara, ef aðkallandi mál bíður afgreiðslu, enda sé þess getið með fundarboðum, hvaða mál sé á dagskrá.

Mál skulu afgreidd í þeirri röð, sem dagskrá segir nema hreppsnefnd ákveði að önnur röð sé höfð.

Heimilt er að taka mál á dagskrá, þótt ekki sé þess getið í fundarboði enda samþykki meirihluti viðstaddra hreppsnefndarmanna þau afbrigði.

6. gr.

Hreppsnefndarfundur skal auglýsa á sama hátt og venja er til um opinberar auglýsingar í hreppnum með sama fyrirvara og gildir um dagskrártilkynningar til hreppsnefndarmanna.

7. gr.

Hreppsnefndarfundur skal halda í heyranda hljóði. Hreppsnefnd getur þó ákveðið að ræða einstök mál fyrir luktum dyrum t.d. einkamál manna, eða mál, sem æskilegt er vegna hagsmuna hreppsins, að rædd séu fyrir luktum dyrum.

Ef tillaga kemur fram um að mál skuli rætt fyrir luktum dyrum skal úr því skorið með atkvæðagreiðslu án umræðu. Óheimilt er að skýra frá því, sem fram kemur við umræður fyrir luktum dyrum.

Ef áheyrandi á hreppsnefndarfundur raskar fundarfriði, getur oddviti látið vísa honum út.

8. gr.

Hreppsnefnd getur enga bindandi ályktun gert nema meira en helmingur hreppsnefndarmanna sé viðstaddur á fundi. Einfaldur meirihluti atkvæða ræður úrslitum mála nema annað sé sérstaklega áskilið í samþykkt þessari.

Sveitarstjóri og hver hreppsnefndarmaður getur borið fram breytingartillögu, viðauka-tillögu, frestunartillögu eða frávisunartillögu við hvert það mál, sem til umræðu er og hreppsnefnd á úrskurðarvald um. Skulu slíkar tillögur vera skriflegar, og skal veittur hæfilegur tími til að semja þær.

Ef jafnmörg atkvæði eru með máli og móti fellur það nema við kosningu og þá ræður hlutkesti.

Mál má afgreiða með því að samþykkja eða fella, vísa því frá með einfaldri eða rökstuddri dagskrá, vísa því til afgreiðslu sveitarstjóra, nefnda eða með því að fresta því.

Oddviti sker úr því hvernig atkvæðagreiðslu skuli hagað.

9. gr.

Hreppsnefnd afgreiðir mál við eina umræðu nema hina árlegu fjárhagsáætlun, ársreikninga og reglugerðir, sem hljóta skulu staðfestingar ráðherra.

Um þessi mál skulu fara fram tvær umræður og líða ein vika það skemmsta milli umræðna.

10. gr.

Atkvæðagreiðsla fer þannig fram, að hreppsnefndarmaður réttir upp hönd. Nafnakall eða skriflega atkvæðagreiðslu skal viðhafa, ef oddviti ákveður, sveitarstjóri óskar eða 2 hreppsnefndarmenn hið fæsta óska.

Við nafnakall er hreppsnefndarmanni skylt að greiða atkvæði nema hann færi rök fyrir undanfærslu sinni er oddviti metur gild. Ef hreppsnefndarmaður vill ekki una úrskurði oddvita má hann skjóta úrskurðinum til hreppsnefndar, sem sker úr án umræðu.

Enginn hreppsnefndarmaður má greiða atkvæði um fjárveitingu til sjálfs sín, eða í máli, sem varðar hann sérstaklega. Honum er þó heimilt að skýra málið af sinni hendi. Hreppsnefnd sker úr því umræðulaust, hvort mál er svo vaxið sem nú var sagt.

11. gr.

Hver hreppsnefndarmaður sem vill taka til máls á hreppsnefndarfundi, skal óska heimildar oddvita.

Að jafnaði skulu hreppsnefndarmenn taka til máls í þeirri röð sem þeir hafa kvatt sér hljóðs. Heimilt er að víkja frá þessu, ef um er að ræða sveitarstjóra eða framsögumenn svo og hreppsnefndarmann, sem vill gera stutta athugasemd eða leiðréttu ummæli um sjálfan hann.

Ef tveir eða fleiri hafa kvatt sér hljóðs samtímis, ákveður oddviti í hvaða röð þeir tala.

12. gr.

Framsögumaður eða flutningsmaður tillögu má tala þrisvar við hverja umræðu máls, en aðrir hreppsnefndarmenn tvisvar, er þó heimilt að taka oftari til máls til að bera af sér ámæli eða gera stutta athugasemd.

Sveitarstjóri, sem ekki er jafnframt hreppsnefndarmaður, skal hafa málfrelsi á hreppsnefndarfundum til jafns við hreppsnefndarmenn.

Hreppsnefndarmaður skal beina máli sínu til oddvita.

13. gr.

Ef oddviti telur umræður dragast úr hófi fram, getur hann lagt til, að umræðutími hvers hreppsnefndarmanns megi ekki fara fram úr ákveðinni tímalengd eða umræðum hætt.

Þá getur oddviti, hvenær sem er, lagt til, að umræðum skuli lokið á ákveðnum tíma. Ekki má þó takmarka umræðu svo að hún standi skemur um dagskrármál en tvo tíma meðan nokkur hreppsnefndarmaður kveður sér hljóðs.

Hreppsnefnd afgreiðir tillögur oddvita sbr. 1. og 2. mgr. umræðulaust.

Hver hreppsnefndarmaður getur borið fram slíka tillögu og skal hún einnig afgreidd umræðulaust.

Ákvæði um takmörkun á ræðutíma eiga ekki við, þegar fjallað er um frumvarp að fjárhagsáætlun.

14. gr.

Skylt er hreppsnefndarmanni að lúta valdi oddvita í hvívetna, er að því lýtur að gætt sé góðrar reglu.

Ef hreppsnefndarmaður ber aðra menn brigslum eða vikur verulega frá umræðuefninu skal oddviti víta hann. Ef hreppsnefndarmaður er víttur tvisvar á sama fundi, getur oddviti lagt til við hreppsnefnd, að hann verði sviptur málfrelsi það sem eftir er fundar. Skal sú tillaga afgreidd umræðulaust.

Ef hreppsnefndarmaður hlýðnast ekki úrskurði hreppsnefndar eða almenn óregla kemur upp á fundi, skal oddviti gera hlé um stundarsakir eða, ef nauðsyn krefur, fresta eða slíta fundi.

15. gr.

Hreppsnefnd getur ákveðið, að allar umræður í hreppsnefnd skuli skrásettar. Má þá ekkert niður fella, sem fram hefur komið á fundi hreppsnefndar og handrit af umræðum bera með sér. Engar breytingar má gera nema leiðrétta þurfi auðsæjar og sannanlegar villur.

Hreppsnefnd getur ákveðið, að umræður skuli gefnar út á prenti ásamt því, sem fært hefur verið í gerðabók, svo og önnur skjöl eftir því, sem nauðsynlegt kann að þykja.

Ef hreppsnefnd ákveður slíka útgáfu skal hún jafnframt kjósa nefnd tveggja hreppsnefndarmanna til að hafa umsjón með útgáfunni.

Þá getur hreppsnefnd ákveðið, að hreppsnefndarfundir séu teknir á segulband til geymslu einhvern ákveðinn tíma.

Eftir hvern hreppsnefndarfund, þar sem umræður hafa verið skrásettar samkvæmt framanrituðu, skal öllum hreppsnefndarmönnum sent eftirrit af fundargerð ásamt fylgiskjölu um hennar.

II. KAFLI

Réttindi og skyldur hreppsnefndarmanna.

16. gr.

Hverjum hreppsnefndarmanni er skylt að sækja fundi hreppsnefndar nema lögleg forföll hamli. Hafi hreppsnefndarmaður forfallast og ekki gert oddvita eða sveitarstjóra viðvart áður en fundarboð fyrir reglulegan fund er sent út, skal hann sjálfur sjá um, að varamanni berist fundarboðið.

Honum er skylt að taka að sér störf sem hreppsnefnd felur honum t.d. oddvitastörf, setur í hreppsráði eða öðrum nefndum o.s.frv.

Sá sem hefur verið oddviti hreppsnefndar, setið í hreppsráði eða öðrum nefndum, getur þó skorast undan kosningu jafnlangan tíma og hann hefur haft starfið á hendi.

Hreppsnefndarmönnum er skylt að koma prúðmannlega fram á hreppsnefndarfundum, gæta þagnarskyldu um einkamál og hagi einstaklinga og félaga, sem þeir kynnu að fá vitneskju um sem hreppsnefndarmenn.

Þá er þeim skylt að gæta hagsmuna og velferðar hreppsins út á við sem inn á við, eftir sinni bestu getu, vinna og stuðla að friðsamlegri lausn deilumála sem upp kunna að koma milli hreppsnefndarmanna.

17. gr.

Hreppsnefndarmönnum er heimilt að kynna sér bækur, skjöl og bréf hreppsins og stofnana hans.

18. gr.

Hver hreppsnefndarmaður á rétt á tiltekinni þóknun fyrir störf sín í hreppsnefnd skv. ákvörðun hennar.

19. gr.

Ef hreppsnefndarmaður, kosinn í nefnd og til annarra starfa, forfallast um stundarsakir vegna veikinda eða af öðrum ástæðum, á hann rétt á að tilnefna mann af sama lista og hann var kjörinn til að taka sæti hans á meðan, enda hafi varamaður ekki verið kosinn.

Hafi hann engan tilnefnt fer um varamenn skv. 2. og 3. mgr. 20. gr. sveitarstjórnarlaga.

20. gr.

Hreppsnefnd getur veitt hreppsnefndarmanni, sem óskar, lausn frá hreppsnefndarstarfi.

III. KAFLI

Hreppsráð.

21. gr.

Að afloknum hreppsnefndarkosningum skulu kosnir hlutfallskosningu, þrír hreppsnefndarfulltrúar í hreppsráð og jafnmargir til vara.

Þó mega varamenn vera út hópi fyrstu varahreppsnefndarfulltrúa. Kjörtími hreppsráðs er eitt ár og fer fram í júnímánuði. Hreppsráð kys sér formann og ritara. Kjósa má sveitarstjóra formann, þó ekki sé hann kjörinn í ráðið.

Hreppsráð, heldur að jafnaði tvo fundi í mánuði. Kveðja skal hreppsráð saman til aukafundar, ef sveitarstjóri telur ástæðu til, eða ef einhver hreppsráðsmaður óskar. Sveitarstjóri undirbýr fundi hreppsráðs og sér um, að fundarboð sé tilkynnt hreppsráðsmönnum með að minnsta kosti sex stunda fyrirvara.

Formaður sér um, að allt fari löglega fram á fundum og úrskurðar ágreiningsmál út af fundarsköpum. Í gerðabók skal greint frá því hvar og hvenær fundur skal haldinn og hverjir sitji hann. Þar skal greint frá dagskrármálum og efni þeirra í stuttu máli, svo og hverja afgreiðslu þau fá. Um fundarsköp hreppsráðs fer eftir sömu reglum og gilda um hreppsnefnd, eftir því, sem þær geta átt við.

22. gr.

Hreppsráði er heimilt að ráða til lykta málum, sem ekki eru veruleg fjárhagsatriði, enda sé ekki ágreiningur í hreppsráði, né við hreppsnefnd um afgreiðsluna.

23. gr.

Hreppsráð hefur eftirlit með fjárstjórn hreppsins. Það undirbýr árlega fjárhagsáætlun og sér um, að ársreikningar séu samdir. Undir hreppsráð heyra öll málefni, sem ekki eru falin sérstökum nefndum.

24. gr.

Skylt er starfsmönnum hreppsins að sitja fundi hreppsráðs, þegar til umræðu eru málefni, er snerta störf þeirra og þess er óskað af sveitarstjóra eða hreppsráði.

IV. KAFLI

Um sveitarstjóra.

25. gr.

Hreppsnefnd ræður sveitarstjóra. Ráðningartími hans skal að jafnaði vera hinn sami og kjörtímabil hreppsnefndar.

Ráðningarsamningur er þó uppsegjanlegur af beggja hálfu með sex mánaða fyrirvara. Á ráðningarkjörtímabilinu þarf ummsögn ráðningarsamnings tvær umræður í hreppsnefnd. Líða skulu minnst 24 klst. milli umræðna.

26. gr.

Sveitarstjóri hefur framkvæmd ákvarðana þeirra, sem hreppsnefnd gerir, og framkvæmd á málum hreppsins yfirleitt að því leyti, sem hreppsnefnd hefur ekki ákveðið annað um tiltekið mál.

27. gr.

Sveitarstjóri á sæti á fundum hreppsnefndar og hreppsráðs, og hefur þar sömu skyldur og réttindi sem hreppsnefndarmenn, nema annað sé sérstaklega tekið fram í þessari samþykkt. Hann á einnig rétt á setu í fastanefndum hreppsins.

Ekki hefur hann atkvæðisrétt í hreppsnefnd, hreppsráði eða fastanefndum, nema hann sé til þess kjörinn.

Hann hefur óbundið málfrelsi og tillögurétt á fundum hreppsnefndar, hreppsráðs og nefnda.

28. gr.

Útgjöld, sem ekki eru lögbundin, samningsbundin eða leiða af fyrri samþykkt hreppsnefndar má ekki greiða, nema til komi samþykkt hreppsnefndar.

Ekkert gjald má greiða úr hreppssjóði, nema sveitarstjóri ávísi því til greiðslu eða einhver sá, sem fengið hefur umboð hreppsnefndar til slíks.

Hreppsnefnd getur heimilað sveitarstjóra að fela öðrum störf sín um skemmri tíma.

V. KAFLI

Endurskoðendur og nefndir.

29. gr.

Hreppsnefnd kýs endurskoðendur til 2 ára í senn til að endurskoða reikninga hreppsins og fyrirtækja hans.

Hreppsnefndarmenn eru ekki kjörgengir til endurskoðunarstarfa. Um framkvæmd endurskoðunar fer eftir ákvæðum d-liðar 3. kafla laga nr. 58/1961.

Lokið skal endurskoðun eigi síðar en 30. apríl ár hvert. Kjörnir endurskoðendur eiga rétt á þóknun fyrir starf sitt eftir ákvörðun hreppsnefndar.

30. gr.

Hreppsráð skal fela löggiltum endurskoðanda endurskoðun og samningu reikninga hreppsins og fyrirtækja hans. Skal hann senda hreppsráði skýrslu um niðurstöður sínar áður en hreppsráð afgreiðir ársreikninga til hreppsnefndar.

31. gr.

Skrá um fastar nefndir skal jafnan vera fest upp í fundarsal hreppsnefndar. Auk fastra nefnda, sem hreppsnefnd kýs, hlutfallskosningu, hefur hún rétt til að setja nefnd í það mál, sem á dagskrá er.

Fer um kosningu þeirra eins og fastra nefnda.

32. gr.

Um skipan nefnda, valdsvið þeirra og verksvið fer eftir því, sem ákveðið er í lögum eða samþykktum hreppsnefndar. Þar sem ekki er um slíkar reglugerðir að ræða getur hreppsnefnd sett þær.

EKKI MÁ framselja slíkri nefnd vald, sem hreppsnefnd er fengið að lögum.

Hreppsnefnd skal að öllu jöfnu leita umsagnar viðkomandi nefnda um einstök mál áður en hún afgreiðir þau.

Þegar kjörtími nefndar er óákveðinn, skal litið svo á, að umboð nefndarmanna falli niður, þegar kjörtímabil hreppsnefndar er á enda, nema um sé að ræða nefnd, sem fengið hefur til úrlausnar ákveðið og afmarkað verkefni. Þá skal litið svo á, að starfi hennar ljúki fyrst er verkefnið er til lykta leitt.

33. gr.

Gerðir fastanefnda og nefnda, sem hreppsnefnd setur í sérstök mál, skulu lagðar fyrir hreppsnefnd til meðferðar og endanlegrar samþykktar eða synjunar.

34. gr.

Afbrigði frá fundarsköpum þessum getur hreppsnefnd gert í einstökum tilfellum, þegar nauðsyn ber til, ef meirihluti mættra hreppsnefndarmanna samþykkir það.

35. gr.

Til þess að gera breytingar á samþykkt þessari þarf umræður á tveimur fundum í hreppsnefnd, samþykki meirihluta atkvæða og staðfestingu félagsmálaráðuneytisins.

Samþykkt þessi, sem samin er og samþykkt af hreppsnefnd Stykkishólmshrepps staðfestist hér með samkvæmt sveitarstjórnarlögum nr. 58/1961 til þess að öðlast gildi þegar í stað. Jafnframt er úr gildi felld samþykkt nr. 253 frá 9. ágúst 1974.

Félagsmálaráðuneytið, 5. mars 1984.

F. h. r.

Hallgrímur Dalberg.

Hólmfríður Snæbjörnsdóttir.

REGLUGERÐ

**um breytingu á reglugerð um aukaframlög úr Jöfnunarsjóði
sveitarfélaga nr. 467 7. ágúst 1981.**

1. gr.

5. gr. reglugerðarinnar orðist svo:

Álagningarskýrsla félagsmálaráðuneytisins skv. 4. gr. skal lögð til grundvallar við útreikning eftirtaldra meðaltala álagðra skattgjalda sveitarfélaga (útsvara, fasteignaskatts og aðstöðugjalda):

- a) landsmeðaltals á íbúa,
- b) meðaltals á íbúa í hreppum með 300 íbúa og fleiri,
- c) meðaltals á íbúa í hreppum með undir 300 íbúa.

2. gr.

1. mgr. 6. gr. reglugerðarinnar orðist svo:

Komi í ljós, að meðaltal álagðra skatttekna í þéttbýlissveitarfélagi, sem sótt hefur um aukaframlag sé lægra en landsmeðaltal, kemur viðkomandi sveitarfélag til greina við úthlutun aukaframlags til jöfnunar þessa mismunar að hluta. Sé um dreifbýlissveitarfélag að ræða, skal jöfnunarviðmiðunin vera meðaltal skatttekna á íbúa í hreppum með undir 300 íbúum sbr. 5. gr. c-lið, en ef í sveitarfélaginu er bæði dreifbýli og þéttbýli, skal heimilt að nota sem jöfnunarviðmiðun meðaltalsskatttekjur á íbúa í hreppum með 300 íbúa og fleiri sbr. 5. gr. b-lið.

Ákvæði til bráðabirgða:

Við álagningu útsvara á árinu 1984 telst skilyrði 1. mgr. 3. gr. reglugerðar þessarar fullnægt, þótt útsvar hafi ekki verið innheimt með álagi skv. 4. mgr. 25. gr. laga nr. 73/1980 um tekjustofna sveitarfélaga.

Reglugerð þessi er sett skv. heimild í 47. gr. laga nr. 73 26. nóvember 1980 til þess að öðlast gildi þegar í stað.

Félagsmálaráðuneytið, 6. mars 1984.

Alexander Stefánsson.

Hallgrímur Dalberg.